

# Predgovor

Povodom šezdesetogodišnjice osnivanja Akademije nauka i umjetnosti Bosne i Hercegovine (1951-2011), Odjeljenje tehničkih nauka je odlučilo da objavi bibliografski opus svojih sadašnjih članova i na taj način po prvi put u jednom izdanju predstavi javnosti dugogodišnju naučnu, stručnu, publicističku i druge djelatnosti i dostignuća članova ovog Odjeljenja.

Sveska odražava široki raspon specijalnosti i profesionalnog fokusa akademika. Iako ograničena na oblasti individualnog djelovanja, vidljivo je da su zastupljene skoro sve oblasti tehničkih nauka u kojima su u našoj zemlji ostvarena značajnija naučna i profesionalna dostignuća u posljednjih nekoliko decenija. Sveska afirmira i brojne ko-autore – kolege i saradnike koji su doprinijeli radovima navedenim u ovoj bibliografiji, što ujedno ilustrira plodnu i raznovrsnu edukativnu dimenziju djelovanja članova Odjeljenja.

Bibliografske jedinice, a posebno naučne publikacije, predstavljene su u skladu s važećim bibliografskim normama (Harvard Referencing Style) i sistematizirane po standardnim, uvriježenim kategorijama. Raznovrsnost aktivnosti pojedinih akademika ne omogućava jedinstvenu kategorizaciju radova, ali smo nastojali da definišemo zajednički nazivnik bar za glavne vrste publikacija kao što su knjige, radovi publikovani u referiranim naučnim časopisima, serijalnim izdanjima i zbornicima. Naravno, kategorije nisu iste za sve članove i, uvažavajući različite profesionalne vokacije, odlučili smo se za toleranciju individualnih pristupa u kategorizaciji u skladu sa željama pojedinih akademika.

I pored napora da se objave kompletne informacije, nijedna bibliografija nije potpuna, dijelom zato što su sami autori izvršili selekciju, a više zbog toga što je tokom ratnih godina (1992-1995) dio bibliografskih podataka, posebno iz predratnog perioda, izgubljen. Značajan doprinos kompletiranju podataka dala je Minela Đelmo, rukovodilac Biblioteke ANUBiH, prikupivši podatke iz raznih domaćih i inostranih baza podataka i sistema (COBISS, ET(R)AN, ISI Web of Science, SCOPUS, Google Scholar, Harzing' PoP, EBSCO host i drugih).

Nadamo se da će ova publikacija poslužiti kao koristan izvor informacija o naučnom i stručnom djelovanju članova Odjeljenja tehničkih nauka, a također i kao prilog afirmaciji ANUBiH u zemlji i inostranstvu. Uvjereni smo da će biti i vrijedan bibliografski putokaz nadolazećoj generaciji naučnih radnika u BiH u oblasti tehničkih, a dijelom i prirodno-matematičkih nauka.